

## M111: Himmlisches Jerusalem

- 0,1 nû sulen wir beginnen .  
0,2 mit tiefen gesinnen .  
0,3 ein rede diuten jouch bestên  
0,4 von dere himelischen Jerusalêm .  
0,5 diu gezimberet ist den reinen  
0,6 ûz den lebentigen steinen .  
0,7 die Johannes sach der gotes trût .  
0,8 nider stîgen sam eine brût .  
0,9 von den himelen zuo der erde .  
0,10 gezieret was si werde .  
0,11 der die himele habe besezzen .  
0,12 die erde umbemezzen .  
0,13 die regenes tropfen gezelet .  
0,14 zuo sîneme dieneste erwelt  
0,15 die engele dâr inne .  
0,16 in sînes namen minne .  
0,17 sô beginnen wir ditzes liedes .  
0,18 vile harte vorhte ich mir des  
0,19 daz etelîche schelten .  
0,20 von den himelen reden wir selten .  
0,21 ze diuten ist uns spæhe .  
0,22 waz Johannes sæhe .  
0,23 Domicius habet in versant  
0,24 in ein ellendez lant .  
0,25 in eine îselen diu heizet Patmos .  
0,26 dâ leit er arbeite grôz .  
0,27 eines sunnentages vruo .  
0,28 der gotes engel kom ime zuo .  
0,29 er huop in ûf schône .  
0,30 die selben burc vrône .  
0,31 hiez er in schouwen .  
0,32 der rede schulen wir zouwen .  
0,33 manigiu wunder er dâ sach .  
0,34 die er ze niemanne redete noch ne sprach .  
0,35 daz was Johannes evangelista .  
0,36 der über die gotes bruste .  
0,37 vile suoze lenete unze er entslief  
0,38 sîn gesinne wâren tief .

0,39 Patmos in der insula  
0,40 ein buoch schreip er dâ .  
0,41 geheizen Apocalypsis .  
0,42 in den himelen was er wîs  
0,43 got verlêch ime den sin .  
0,44 die burc schreip er dâr inne .  
0,45 den namen sach er dâr obe stân .  
0,46 der himelischen Jerusalêm .  
0,47 mit güldîn buochstaben .  
0,48 an der porte wole ergraben .  
0,49 daz buoch saget uns ze diute .  
0,50 von der hoehe . unde von der wîte .  
0,51 unde von der lenge . unde von der breite .  
0,52 allez sô gereite .  
0,53 diu burc ist gewerket .  
0,54 ze undereste XII . lecke .  
0,55 an der gruntveste .  
0,56 aller steine bezziste .  
0,57 dâ gênt in XII porte .  
0,58 an iegelîchem orte .  
0,59 der selben porte doch drî .  
0,60 apostolorum nomina et agni .  
0,61 die selben XII porte . alle  
0,62 sint si lûtere kristallen .  
0,63 an der ôsteren porte stânt doch drî .  
0,64 got bezeichnenet uns dâ bî .  
0,65 sweliche von kindes beine .  
0,66 sint lûter unde reine  
0,67 den werdent die porte entsperret .  
0,68 dannen uns der sunne erschînet unde errinnet .  
0,69 in sunderen porten stânt doch drî .  
0,70 bezeichnenet ist uns dâ bî .  
0,71 sweliche in al tugende .  
0,72 sint ze gote hügente .  
0,73 den werdent die porte ûf getân .  
0,74 dannen wir die wirmen unde den sumer haben .  
0,75 hin nordert stânt porte doch drî .  
0,76 bezeichnenet ist uns dâ bî .  
0,77 swenne der mennische wirdet alt .  
0,78 aller sîn lîp ist im kalt .  
0,79 ze den kreften ime gebristet .  
0,80 alliu sîn tugende erleschent .  
0,81 daz alter in begrîfet .  
0,82 diu jugent dannen slîfet .  
0,83 wile er dannoch gote dienen .  
0,84 er mac sich verwænen .  
0,85 ime werden die porten ûf getân  
0,86 dannen wir den winter unde den vrost haben .

0,87 hine westeret stânt porte doch drî .  
0,88 bezeichnenet ist uns dâ bî .  
0,89 swer sîne sünde .  
0,90 spart an den ende .  
0,91 daz er ne mac leben mêre .  
0,92 riuwent si in dannoch sêre .  
0,93 ime werdent die porte entsperret .  
0,94 dannen uns des liehtes unde des tages zerrinnet .  
0,95 swie wir sô menschlichen  
0,96 komen in gotes rîche .  
0,97 wir schulen iedoch sament bûwen .  
0,98 die sæligen hebent sich vile vruo .  
0,99 unde warnent sich wole zuo .  
0,100 vile manige leider spâte .  
0,101 die bedurfên . arzâte .  
0,102 ze der hineverte .  
0,103 ire wege die sint herte .  
0,104 unde magen iedoch vile wole genesen .  
0,105 harte belanget siu dâ ze wesen .  
0,106 in deme hellewîze .  
0,107 êr man die porte entslieze .  
0,108 nû biren wir gevorderet  
0,109 sundert unde nordert .  
0,110 ôstert unde westeret .  
0,111 jâ schol iedoch gepflasteret  
0,112 diu selbe burc mit uns sîn .  
0,113 der winkelstein ist mîn trehtîn .  
0,114 der die zwâ wende .  
0,115 besliuzet an dem ende .  
0,116 diu wunder diu sint manicslaht .  
0,117 dâ ne ist vinsten noch diu naht .  
0,118 diu mæninne noch der sunne .  
0,119 ne schînet dâr inne  
0,120 noch der tagesterne  
0,121 dâ ist diu lucerne .  
0,122 der himelkûninc eine .  
0,123 daz edele gesteine .  
0,124 liuhtet dâr sam iz brinne .  
0,125 di strâze dâr inne .  
0,126 die sint durchsotenez golt .  
0,127 diu burc nechein meil dolet .  
0,128 an der burcmûre reine .  
0,129 ligent XII steine .  
0,130 vore den anderen allerhêrest .  
0,131 die nennen wir iu allerêreste .  
0,132 der eine heizet jaspis .  
0,133 unde lît ze allerunderest .  
0,134 an der gruntveste

0,135 unde habet ûf daz gerüste .  
0,136 ze wâre sagen ich iu daz .  
0,137 der ist grüene sam ein gras .  
0,138 der tiuvel dannen vliuhet  
0,139 den selben stein er schiuhet .  
0,140 swâ er lît oder stât  
0,141 ode in der mennische hât .  
0,142 in sîner gewelte .  
0,143 beworht mit golde an der hende .  
0,144 nû vernemet lieben liute .  
0,145 waz der stein bediute .  
0,146 sîn varwe ist ime grüene .  
0,147 der tiuvel ist sô küene .  
0,148 alsam der lewe wilde .  
0,149 jâ vert er rüchelente  
0,150 wie er uns müge verswelhen .  
0,151 sô sulen wir uns gote bevelhen .  
0,152 mit deme gelouben vile vaste .  
0,153 sô ligen wir ze undereste .  
0,154 an der gruntveste .  
0,155 unde bezeichnen den jaspin .  
0,156 er vliuhet sam man in brenne .  
0,157 grüene bire wir denne .  
0,158 swer sô gelouben niene hât .  
0,159 der ist dürre unde tôt .  
0,160 der tiuvel in niene mîdet .  
0,161 wande er den gelouben nîdet .  
0,162 sô ist der ander stein sus .  
0,163 saphyrus geheizen .  
0,164 nâch deme himele ist er vare .  
0,165 swenne unsich unser muot treit dare .  
0,166 des en ist zwîvel nechein .  
0,167 sô bezeichnen wir den selben stein .  
0,168 dâ diu burc ist mite gezieret  
0,169 alsô uns daz buoch lêret  
0,170 der himelischen Jerusalêm  
0,171 diu niemer schol zergên .  
0,172 von êwen unde ze êwen .  
0,173 sô ist der III. . stein sus  
0,174 geheizen calcedonius .  
0,175 der ist tunkel in deme hûse .  
0,176 unde schînet sô man in treit ûz .  
0,177 wirdet er von der sunnen warm .  
0,178 bestrîchet in vinger oder arm .  
0,179 sô hebet er ûfwerte .  
0,180 den halm von der erde .  
0,181 er en lât sich niht ergraben .  
0,182 man muoz in umbeworeht haben .

0,183 gerüeret in diu vîle .  
0,184 er zevert in einer wîle .  
0,185 alsô kleine sô daz glas  
0,186 er ist herte unde was .  
0,187 von diu sô mac er wole stên .  
0,188 in der himelischen Jerusalêm .  
0,189 der selbe stein bezeichnenet .  
0,190 swer sîn herze unde sîn muot .  
0,191 unde alle sîne liste .  
0,192 ze gote kêret vaste .  
0,193 er hilt sich sîner güete .  
0,194 vliuhet übermuote .  
0,195 der ist tunkel in deme hûse .  
0,196 swenne er aber kumet ûz .  
0,197 sô schînent sîne güete .  
0,198 swie starke er sich behüete .  
0,199 diu werlt sihet . algemeine .  
0,200 ob er kiusche ist und reine .  
0,201 er dolet daz man in ertôtet .  
0,202 êr man [in] des genôtte .  
0,203 daz er wandele sîn sinne .  
0,204 sô bezeichnenet got den sunnen .  
0,205 von dem er dâ wirdet warmer .  
0,206 ûf hebet er den armen .  
0,207 den süntigen von der erde .  
0,208 sam der stein tuot di halme .  
0,209 sô ist der . IV. . stein sus  
0,210 geheizen . smaragdus .  
0,211 in der werelte ist niht sô grüne  
0,212 er beneme ime sîne schoene .  
0,213 ein lant heizet Cythia  
0,214 der steine vindet man dâ .  
0,215 alsô vile sô der grieze .  
0,216 torste man si niezen .  
0,217 dâ sint inne grîfe  
0,218 vore vroste . und vore rîfen .  
0,219 und vore den starken grûwen .  
0,220 sô lît iz unerbûwen .  
0,221 di vogele unreine .  
0,222 werent daz gesteine .  
0,223 swer iz dâ wile gewinnen .  
0,224 werdent si sîn innen .  
0,225 er muoz sîn kiesen den tôt .  
0,226 daz tuont di vogele âne nôt .  
0,227 si bedurfen sîn ze nihte .  
0,228 in der vinstere . noch in deme liechte .  
0,229 und enbunnen es iedoeh den liuten .  
0,230 daz wile ich her nâch diuten .

- 0,231 sô sint einiu liute dâ bî .  
0,232 heizent Arimaspi\* .  
0,233 di wizzen ire tougene  
0,234 newær eines ougen .  
0,235 habent si vorne an dem ende .  
0,236 daz ist ire urkennede .  
0,237 diu liute sint sô küene .  
0,238 si nement di steine grüene .  
0,239 den vogelen mit gewalte .  
0,240 si sint wert daz man si wole gehalten .  
0,241 den vile grünen steinen .  
0,242 ebenmâzen wir di einen .  
0,243 mügen si wole sunderen .  
0,244 di des gelouben sint vore den anderen  
0,245 nû bezeichnenet daz lant kalt  
0,246 di der untriuwe habent manicvalt .  
0,247 unde lebent âne minne .  
0,248 die grîfe dâr inne .  
0,249 di bezeichnenent di tiuvel di dâ varent .  
0,250 unde den gelouben bewarent .  
0,251 daz nieman den nieze .  
0,252 swie lützel er si büeze .  
0,253 diu liute mit einem ougen .  
0,254 diu bezeichnenent âne lougen .  
0,255 di dâr einen got bekennent .  
0,256 den gelouben si gewinnent .  
0,257 vore dem tiuvel mit gewalte .  
0,258 als ich iz iu êr von den steinen zaletē .  
0,259 des ne ist zwîvel nechein .  
0,260 sardonix heizet der . V. . stein .  
0,261 varwe [hât] er doch drî .  
0,262 daz gediuete sagen wir iu dâr bî .  
0,263 er ist undene swarz sô daz glas .  
0,264 ze wære sagene ich iu daz .  
0,265 mitten wîz sô der snê .  
0,266 rôst ist er obene .  
0,267 nû bezeichnenet diu varwe rôst .  
0,268 swer lîdet marter und nôst .  
0,269 durch diu gotes minne .  
0,270 diu wîze dâr inne .  
0,271 dem lûter ist sîn herze .  
0,272 diemuot diu swerze .  
0,273 bezeichnenet âne zwîvel .  
0,274 vile gerne er verrâtet den man .  
0,275 wande er den êresten gewan .  
0,276 mit dem selben stricke  
0,277 dâ mite vellet er unsich leider alsô dicke .  
0,278 nû ist der . VI. . stein . sus .

0,279 geheizen sardius .  
0,280 der ist sô rôr sô daz bluot .  
0,281 und bezeichnenet di marterære guot .  
0,282 di mit ire tôde .  
0,283 di êwigen genâde  
0,284 habent erworben umbe got .  
0,285 liden huoch unde spot .  
0,286 unde nît unde haz  
0,287 vile wole gestaten si daz .  
0,288 sô lît daz allîche here .  
0,289 oben an der brustwere  
0,290 der himelischen bürge .  
0,291 si habent ire sorge .  
0,292 geworfen zerügge .  
0,293 di sint unser brügge .  
0,294 si sulen unsic leiten .  
0,295 ûz disen arbeiten .  
0,296 ze der himelischen . Jerusalêm .  
0,297 obe wir wellen begên .  
0,298 di gewoneheit di si habent  
0,299 die wîle daz si lebeten .  
0,300 der VII. . stein ist sus  
0,301 geheizen . crisolitus .  
0,302 sîn varwe ist ime einvalt .  
0,303 unde schînet alsô daz golt .  
0,304 daz ist wunder meist .  
0,305 von ime varent ganeiste .  
0,306 alsô von dem brinnten viure .  
0,307 der stein ist edele unde tiure .  
0,308 sô bezeichnenet diu varwe sô daz golt .  
0,309 sweme got verlihet den gewalt  
0,310 daz er ist guoter liste .  
0,311 unde sînen ebenkristen .  
0,312 stiuret und lêret .  
0,313 zuo dem bezzere . kêret .  
0,314 mit dem selbem geiste  
0,315 daz sint di ganeisten .  
0,316 di von deme steine springent .  
0,317 di dâ mit rigent .  
0,318 unde rehte wellent leben .  
0,319 den wirdet diu heimuote gegeben .  
0,320 der himelischen Jerusalêm .  
0,321 daz si dâ zevordereste scholen stên .  
0,322 sô ist der VIII. . stein sus  
0,323 geheizen beryllus .  
0,324 der ist sô lûter sô der brunne .  
0,325 sô dâr in schînet der sunne .  
0,326 der steine ist lützel in deme lande .

0,327 ich weiz er warmet di hant .  
0,328 swer in mit gedwange .  
0,329 dâr inne hât lange .  
0,330 der bezeichnenet di rehten .  
0,331 di erliuhtet mîn trehtîn .  
0,332 mit dem sînen geiste .  
0,333 daz licht ist allermeiste .  
0,334 sweliche dannen gâhent .  
0,335 unde sich zuoze ze ime vâhent .  
0,336 di werdent danne reine .  
0,337 alsô diu hant warmet von dem steine .  
0,338 der IX. . stein ist sus .  
0,339 geheizen . topazius .  
0,340 varwe habet er doch zwâ .  
0,341 daz buoch saget uns sô .  
0,342 diu eine ist heiter unde mære .  
0,343 nâch dem himele gevare  
0,344 diu ander lûter sô daz golt .  
0,345 di künige sint ime holt .  
0,346 unde minnent in mære .  
0,347 denne ander zwêne .  
0,348 sô schône ne ist niht ze sehene  
0,349 den liuten ze jehene .  
0,350 al des in der werelt ist .  
0,351 jâ habet der waltente Krist .  
0,352 sîne burc dâ mit gezinnet .  
0,353 er ist wole wert daz man in minnet .  
0,354 nû sulen wir werden enein  
0,355 waz bezeichnenet der stein .  
0,356 alsô [heiter] [unde] mære  
0,357 einen offenen süntære  
0,358 den riuwent sîne schulde .  
0,359 unde er gotes hulde .  
0,360 mit noeten gewinnet .  
0,361 alsô daz viur brennet .  
0,362 ûz dem koffer daz golt .  
0,363 sô wirdet ime got vile holt .  
0,364 und minnet in mære .  
0,365 denne ander bezzere .  
0,366 nâch dem himele ist er gevarwe .  
0,367 swenne in sîn muot treit dare  
0,368 alsam êr ze den sünden  
0,369 êr in di riuwe ervunden .  
0,370 der . X. . stein ist sus  
0,371 geheizen crisophirus .  
0,372 purpurîner varwe .  
0,373 ist er begarwe  
0,374 dâ stênt ane topfen .



0,375 sam di golttropfen .  
0,376 dâr ane sîn gemâlet .  
0,377 der selbe stein bezeichnenet .  
0,378 swer dise ellende leben  
0,379 umbe daz êwige hât gegeben .  
0,380 unde hier lîdet martere unde nôt .  
0,381 ze allerjungeste den tôt  
0,382 kiuset an dem ende .  
0,383 daz sint di steinwende .  
0,384 di ûf habent di balken .  
0,385 under allen mînes trehtînes schalken .  
0,386 sô ist der . XI. . stein sus  
0,387 geheizen jacinctus .  
0,388 der wandelet sîne varwe  
0,389 sô dicke nâch dem himele .  
0,390 ist er trûebe oder grâ .  
0,391 dâ nâch varwet er sich sâ  
0,392 dâ mite zeichnenet er di .  
0,393 di sich verwandelent hier  
0,394 in aller slahte vreisen .  
0,395 vile dicke nâch den wîsen .  
0,396 den armen ist er milte  
0,397 den guoten gehende .  
0,398 den ûbelen gedultic .  
0,399 den rîchen invaltic .  
0,400 swie sô diu werelt tuot .  
0,401 dar nâch kêrent si ire muot .  
0,402 si ne koment niht ze der winsteren .  
0,403 wir magen si wole ze den vensteren .  
0,404 an di burc schaffen .  
0,405 nû ist ire leben geistlich und offen .  
0,406 der . XII. . stein der ist abe sus  
0,407 geheizen . amethystus  
0,408 der ist rôt sô daz bluot .  
0,409 unde lohet sô daz viur tuot  
0,410 der bezeichnenet di marterære .  
0,411 di gotes erzeboten wâren .  
0,412 behalten in der minne .  
0,413 daz ist der louc dâr inne .  
0,414 di in allen ire noeten .  
0,415 bitent got den guoten .  
0,416 daz er ire vîanden vergebe .  
0,417 di in verteilent daz leben .  
0,418 des ne ist zwîvel nechein .  
0,419 ze oberest lît der selbe stein .  
0,420 an mînes trehtînes bürge .  
0,421 unde besliuzet daz gewelbe .  
0,422 der himelischen Jerusalêm .

0,423 ze oberest mac er wole stên .  
0,424 sîn kraft ne lât in niht wîchen .  
0,425 nechein . tugent mac si erreichen .  
0,426 di ire vîande minnent .  
0,427 gewisse si hôhe brinnent .  
0,428 starke under ire brusten .  
0,429 nû schulen wir di burc mezzen .  
0,430 diu stat unbeslozzen .  
0,431 offen in alle zît .  
0,432 di hoehe joch di wîte .  
0,433 unde di lenge dâ bî .  
0,434 ganz algelîche ist si .  
0,435 bezeichnenet ist uns dâ bî  
0,436 dâr vûre stênt wende doch drî .  
0,437 ze wâre sagen ich iu daz .  
0,438 fides . spes . caritas  
0,439 der geloube joch diu minne  
0,440 der zuoversiht dâr inne .  
0,441 rîchesenet mit gewalte .  
0,442 dannen koment uns ander tugende manicvalten .  
0,443 nû habent ir alle wole vernomen .  
0,444 wie ir in di burc schulet komen  
0,445 und wie ir ez ouch müget verwerken .  
0,446 woltent ir daz merken .  
0,447 swâ man eine guote rede tuot .  
0,448 dem tumben unmære .  
0,449 der heizet ime singen  
0,450 von werltlîchen dingen .  
0,451 und von der degenheite  
0,452 daz en dunket in arbeite .  
0,453 wir haben noch zweiere wege gewalt .  
0,454 alsô uns der apostolus vore zalte .  
0,455 der eine ist breit und wît .  
0,456 offen stât er in allen zît .  
0,457 er treit iuch in di helle .  
0,458 ime volge der der welle .  
0,459 der ander enge und smal .  
0,460 er wîset iuch inne den sal .  
0,461 der sorge . und al des iu hier ze leide geschach .  
0,462 sô ne darf iuch daz ungemach  
0,463 niemer geriuwen .  
0,464 daz ir hier habet entriuwen .  
0,465 erliten durch die gotes ê .  
0,466 sô ist abe den vile wê .  
0,467 di die helle müezen bûwen .  
0,468 des schulen wir gote getrûwen .  
0,469 der unsich erlôste dannen .  
0,470 nû sît ir dem tiuvele verboten unde verbannen

0,471 âmen .